



# Cyflwyno'r Gwasanaeth Hunaniaeth Cenedlaethol

Sut y bydd y Gwasanaeth yn gweithio a sut y bydd o fudd i chi

  
Swyddfa Gartref

**Y Gwasanaeth  
Hunaniaeth a Phasbortau**

Nodwch, at ddibenion enghreifftiol yn unig y mae'r cardiau adnabod a ddangosir.  
Gallai cynllun y cerdyn terfynol newid.

# Y Gwasanaeth Hunaniaeth Cenedlaethol

Mae'r Gwasanaeth Hunaniaeth Cenedlaethol ar ei ffordd dros yr ychydig flynyddoedd nesaf, ac yn y pen draw bydd pawb yn cael y cyfle i gael cerdyn adnabod os byddant yn dymuno gwneud hynny. Mae'r daflen hon yn disgrifio ar ba ffurf y bydd y Cynllun Hunaniaeth Cenedlaethol yn y dyfodol a sut y bydd o fudd i chi.

Bydd y Gwasanaeth Hunaniaeth Cenedlaethol (a fydd yn cwmpasu cardiau adnabod a phasbortau mwy diogel) yn arwain at fudd go iawn ac amlwg i bob un ohonom, yn unigol a gyda'n gilydd. Mewn amser, bydd yn:

- **gwneud bywyd yn haws** drwy roi modd hawdd a chyfleus i chi brofi pwy ydych;
- **helpu i'ch diogelu rhag achosion o ddwyn a thwyll hunaniaeth** drwy roi modd syml a chyffredinol i chi brofi pwy ydych;
- **rhoi tawelwch meddwl i ni** fod gweithwyr mewn swyddi sy'n gofyn am ymddiriedaeth, fel gweithwyr ochr yr awyr mewn meysydd awyr, wedi rhoi eu manylion cywir;
- **helpu i ddiogelu'r wlad** rhag mewnfudo anghyfreithlon a helpu i leihau cyflogaeth anghyfreithlon;
- **ei gwneud yn anos i droseddwyr** ddefnyddio manylion adnabod ffug neu luosog a thrwy hynny helpu i'n diogelu rhag troseddu a therfysgaeth.

Rhaglen hirdymor ydyw a daw rhai o'r prif fanteision i'r wlad yn gyffredinol pan fydd niferoedd mawr o bobl wedi cofrestru.

# Pam cael cerdyn adnabod?

Heddiw, mae pobl yn gorfod defnyddio amrywiaeth o ddogfennau i brofi pwy ydynt: pasbortau, trwyddedau gyrru, tystysgrifau geni, biliau cyfleustodau, ac ati. Fodd bynnag, nid yw'r un o'r rhain yn ddogfennau adnabod swyddogol a hefyd, bydd angen i chi ddefnyddio mwy nag un o'r dogfennau hyn yn aml i brofi pwy ydych. Weithiau, byddwch yn gorfod rhoi mwy o wybodaeth bersonol nag sy'n angenrheidiol neu'n ddymunol wrth ddefnyddio'r dogfennau hyn – er enghraifft, manylion ar eich cyfriflen banc.

Bydd cerdyn adnabod yn cynnig ffordd ddefnyddiol a mwy cyfleus i unigolyn brofi pwy ydyw mewn amrywiaeth eang o amgylchiadau. Yn dibynnu ar lefel y sicrwydd hunaniaeth sy'n ofynnol ar gyfer trafodyn penodol, caiff hunaniaeth unigolyn naill ai ei gadarnhau'n weledol, drwy roi rhif PIN neu drwy edrych ar olion bysedd drwy sglodyn ar y cerdyn, neu ar gyfer y lefel uchaf o sicrwydd, drwy edrych ar y Gofrestr Hunaniaeth Genedlaethol.

Fel cardiau mewn gwledydd Ewropeaidd eraill, bydd y cerdyn adnabod hefyd yn caniatáu i chi deithio yn Ewrop heb fod angen i chi gael pasbort.

# Pryd y gallaf gael cerdyn?

Os ydych am deithio dramor, bydd angen i chi naill ai gael cerdyn adnabod neu basbort. O 2012 ymlaen, wrth wneud cais am y naill ddogfen neu'r llall bydd angen i chi gofrestru â'r Gwasanaeth a gofynnir i chi roi eich olion bysedd a ffotograff. Fodd bynnag, ni fydd yn ofynnol i chi gario na dangos cerdyn adnabod. Ac os nad ydych am gael cerdyn adnabod byddwch yn parhau i deithio gan ddefnyddio eich pasbort.

Yn 2010 bydd y Gwasanaeth ar gael i bobl ifanc ar sail wirfoddol. Byddant yn cael budd ar unwaith o gael ffurf syml a diogel o brofi pwy ydynt wrth iddynt ddechrau ar eu bywydau fel oedolion.

Yn 2009, bydd yn ofynnol i rai categorïau o gyflogeion sy'n gweithio mewn rolau neu leoliadau sensitif penodol gofrestru gyda'r Gwasanaeth gan ddechrau gyda gweithwyr ochr yr awyr mewn meysydd awyr. Bydd hyn yn rhan o wiriadau adnabod cyn cyflogi gwell a fydd yn cyflwyno lefelau diogelwch gwell.

Yn 2009 a 2010 £30 fydd y ffi gychwynnol ar gyfer cael cerdyn adnabod.

O fis Tachwedd 2008, bydd cardiau adnabod gwladolion tramor yn dechrau disodli'r hawlebau papur hen ffasiwn i drigolion sy'n wladolion tramor sydd eisoes yn orfodol. Bydd y rhain yn helpu i sicrhau mai dim ond y rheini sydd â hawl i fod yma a all gael cyflogaeth a'r buddiannau eraill sy'n gysylltiedig â bod yn y DU.

# Sut y byddaf yn defnyddio fy ngherdyn?

Mae sawl sefyllfa lle mae angen i chi brofi pwy ydych. Bydd y cerdyn adnabod yn caniatáu i chi wneud hyn mewn sawl ffordd, a nodir rhai ohonynt isod.

## Profi eich oedran

Mae Sita wedi mynd allan gyda grŵp o ffrindiau ar ôl coleg. Mae pawb yn dathlu ac mae Sita yn cynnig prynu rownd. Pan aiff at y bar mae'r dyn y tu ôl i'r bar yn gofyn am brawf ei bod dros 18 oed. Mae Sita yn chwerthin ac yn dweud ei bod yn 19 oed, ond mae'r dyn y tu ôl i'r bar yn newydd ac mae'n mynnu cael prawf o'i hoedran. Mae Sita yn chwilio yn ei bag ac yn dod o hyd i'w cherdyn adnabod. Mae'n ei roi i'r dyn i gadarnhau ei bod yn 19 oed. Wrth iddi roi'r cerdyn yn ôl yn ei phwrs mae hi'n falch nad oes rhaid iddi bellach ddangos dogfennau gyda'i chyfeiriad arnynt i brofi ei hoedran.



## **Teithio yn Ewrop**

Mae Claire yn wladolyn Prydeinig sy'n gweithio i fanwerthwr rhyngwladol ac mae'n rhaid iddi deithio llawer ar gyfer ei gwaith. Roedd yn arfer cario ei phasbort gyda hi bob amser ond roedd yn gwisgo'n gyflym ac yn edrych yn flêr. Nawr mae hi'n cadw ei cherdyn adnabod yn ei phwrs a dim ond pan fydd yn mynd y tu allan i Ewrop y bydd yn defnyddio ei phasbort.

Pan fydd yn cyrraedd yn ôl i'r maes awyr bydd yn gallu cerdded yn syth i fyny at glwyd awtomataidd sy'n edrych fel hanner lifft gwydr a hanner clwyd fel y rhai wrth fynedfa sawl gorsaf reilffordd. Bydd Claire yn mynd drwy un glwyd, yn rhoi ei cherdyn adnabod mewn slot, ac unwaith y bydd ei hunaniaeth wedi'i chadarnhau, bydd ochr arall y glwyd yn agor i'w gadael trwodd.



## Sut y byddaf yn defnyddio fy ngherdyn? (parhad)

Ni fyddai angen edrych ar y Gofrestr Hunaniaeth Genedlaethol ar gyfer y mathau o achlysuron pan y gellid gofyn i chi brofi pwy ydych o ddydd i ddydd. Fodd bynnag, pan fydd angen y lefel uchaf o sicrwydd ar gyfer sefyllfa, fel trefnu morgais neu fynd am swydd mewn rôl neu leoliad sensitif, efallai y bydd angen edrych ar y Gofrestr. Pan fydd hyn yn digwydd ni fydd eich manylion yn gadael y Gofrestr. Anfonir cadarnhad bod y manylion ar eich cerdyn yn cyfateb i'r manylion ar y Gofrestr drwy ateb Ie/Na i'r sefydliad sy'n gwneud cais.





## Sut y byddaf yn defnyddio fy ngherdyn? (parhad)

### Cael morgais

Mae David yn chwilio am forgais. Mae wedi dod o hyd i gynnig y mae ganddo ddiddordeb ynddo gyda benthyciwr newydd.

Pan aiff yno mae'n synnu o glywed y gallant ddilysu ei fanylion nawr a dechrau prosesu ei gais ar unwaith, gan fod ei gerdyn adnabod ganddo. Mae'r cwmni wedi cael ei achredu gan y Gwasanaeth Hunaniaeth a Phasbortau a gall gadarnhau manylion drwy edrych ar y Gofrestr Hunaniaeth Genedlaethol.

Mae'r cynghorydd yn gofyn am ganiatâd i edrych ar fanylion David ar y gofrestr.

Yn ystod eu sgwrs am y math o forgais y mae am ei gael daw'r ymateb o'r Cofrestr Hunaniaeth Genedlaethol yn cadarnhau bod manylion David yn ddilys.

Mae'r cynghorydd yn nodi bod yn rhaid i'r benthyciwr gadarnhau'r penderfyniad i fenthycu ac y bydd yn cysylltu â David mewn ychydig ddiwrnodau.

Drannoeth, mae David yn edrych ar ei gofnod ar y Gofrestr Hunaniaeth Genedlaethol, a gall weld bod gwiriad y cwmni morgais wedi'i nodi wrth ei fanylion.



## Sut y byddaf yn defnyddio fy ngherdyn? (parhad)

Mae'n bosibl y bydd rhai amgylchiadau pan fyddwch am i ni ddarparu gwybodaeth i sefydliad ar eich rhan. Dyma ddwy enghraifft, ac mae'r cyntaf eisoes yn digwydd heddiw gan ddefnyddio'r system basbort.

### **Gwneud cais am drwydded yrru**

Mae Gemma newydd gael ei phen-blwydd yn 17 oed ac mae'n awyddus i ddysgu sut i yrru. Cyn y gall drefnu ei gwers gyntaf mae angen iddi wneud cais am ei thrwydded dros dro ac mae'n llenwi'r ffurflen ar-lein yn y coleg yn ystod gwers rydd.

Mae Gemma yn cofrestru ar wefan y DVLA ac yn dechrau llenwi'r ffurflen. Yn yr adran ynghylch cadarnhau pwy ydyw mae'n gofyn iddi am rif ei phasbort neu ei cherdyn adnabod. Mae gan Gemma gerdyn adnabod, mae hi'n nodi'r rhif, ac yn ticio'r blwch i ddweud ei bod yn fodlon i'r DVLA gael ei llun a'i llofnod yn electronig gan y Gwasanaeth Hunaniaeth a Phasbortau. Mae hynny'n golygu na fydd yn rhaid iddi argraffu'r ffurflen a'i hanfon drwy'r post gyda llun newydd wedi'i ddilysu.

Os ydych yn newid swyddi mae'n arfer safonol i'ch cyflogwr newydd ofyn i chi am brawf adnabod a phrawf o'ch hawl i weithio yn y DU. Gall y ddau beth hyn gymryd amser i'w cadarnhau. Yn y dyfodol, gallech roi eich cerdyn adnabod, ac os byddech yn dymuno a bod eich cyflogwr wedi'i achredu'n addas gyda'r Gwasanaeth Hunaniaeth a Phasbortau, gallech ofyn i ni roi eich Rhif Yswiriant Gwladol i'ch cyflogwr.

### **Cadarnhau eich hawl i weithio**

Mae gan Bill siop goffi ac mae newydd gynnig swydd i Sally i ddechrau gweithio yno yr wythnos nesaf. Cyn y gall ddechrau, mae'n arfer safonol cadarnhau pwy ydyw a'i hawl i weithio felly mae Bill yn gofyn i Sally am dystiolaeth o'r ddau. Mae Sally yn dewis dangos ei cherdyn adnabod i Bill sy'n cadarnhau pwy ydyw a'i hawl i weithio yn y DU ac yn rhoi caniatâd iddo gael ei Rhif Yswiriant Gwladol gan y Gwasanaeth Hunaniaeth a Phasbortau. Mae Bill yn falch gan ei fod yn golygu y gall wneud y trefniadau talu a didynnu ar ei chyfer yn gyflym gan wybod y byddant yn gywir y tro cyntaf.

# Sut y gallaf gael un?

Os ydych yn 16 oed neu'n hŷn ac yn penderfynu yr hoffech gael pasbort neu gerdyn adnabod bydd angen i chi wneud cais. Bydd y broses yr un fath p'un a ydych am wneud cais am basbort neu gerdyn adnabod, neu'r ddau. Bydd gwladolion tramor yn cael y cerdyn fel rhan o'r broses fewnfudo arferol.

Byddwch yn gallu gwneud cais ar-lein, a bydd y wybodaeth y bydd ei hangen yn debyg i'r wybodaeth sydd ei hangen ar y ffurflen gais bresennol am basbort. Fodd bynnag, os byddwch yn dewis, neu os byddwch am gael help i gwblhau eich cais, gallwch ymweld ag un o'n partneriaid, er enghraifft manwerthwr, a fydd yn darparu gwasanaethau cofrestru swyddogol ar eich stryd fawr leol.

Yr elfen ddiogelwch newydd a gaiff ei chynnwys pan fyddwch yn cofrestru naill ai i gael pasbort neu gerdyn adnabod fydd llun o'ch olion bysedd. Felly, bydd angen i chi ymweld ag un o'n busnesau partner i gael tynnu eich llun a chofnodi eich olion bysedd.

### **Cofnodi olion bysedd**

Mae Anna yn brysur ac mae'n poeni y bydd yn cymryd llawer o amser iddi fynd i gofnodi ei holion bysedd er mwyn cwblhau ei chais am ei cherdyn adnabod. Llenwodd y ffurflen gais ar-lein ychydig ddyddiau yn ôl a chafodd e-bost gyda manylion ei hapwyntiad.

Yn ystod ei hawr ginio mae Anna yn mynd at un o'n partneriaid yn y sector preifat ar y stryd fawr gan ddisgwyl gorfod aros yn hir a heb wybod beth fydd y broses.

Mae aelod o staff yn ei chroesawu ac yn egluro'r broses gofrestru iddi. Mae'n rhoi ei rhif cyfeirnod o'i chais ar-lein, mae'n cael tynnu ei llun, mae'n rhoi ei bysedd ar y synhwyrdd, ac yna'n llofnodi ei henw gan ddefnyddio'r pad electronig a ddarperir. Mae'r holl broses yn cymryd tua deg munud.

Mewn rhai achosion gofynnir i ymgeiswyr ddod am gyfweliad fel y byddwn ar hyn o bryd yn gwahodd oedolion sy'n gwneud cais am eu pasbort cyntaf. Nid prawf yw hwn. Mae'n ein galluogi i gadarnhau mai eich manylion chi sydd ar y ffurflen gais ac mai chi sydd yn y llun.

### **Gwasanaeth cyfweld dros fideo**

Mae Iain yn byw yn yr Hebrides. Mae'n edrych ymlaen at ei wyliau. Nid yw erioed wedi bod dramor ac mae newydd dalu am wyliau gyda'i ffrindiau, unwaith y bydd eu harholiadau drosodd. Nawr dim ond cael pasbort sy'n rhaid iddo ei wneud. Anfonodd y ffurflen mewn da bryd, cofnododd ei olion bysedd ac mae ei gyfweliad fore heddiw.

Gan ei fod yn byw gryn bellter o brif swyddfa cynhelir ei gyfweliad gan ddefnyddio cyswllt fideo diogel yn ei awdurdod lleol. Ar ôl cyrraedd eu swyddfa caiff ei gyfeirio at yr ardal gofrestru lle mae aelod o staff yn sicrhau bod y cyfarpar fideo yn gweithio. O fewn ychydig funudau mae'n siarad â chyfwelydd o'r Gwasanaeth Hunaniaeth a Phasbortau yn Glasgow. Mae hi'n cadarnhau ei enw, ei ddyddiad geni a'i gyfeiriad ac yna mae'n holi cwestiynau iddo yn seiliedig ar y ffurflen gais a rhai ar ffynonellau gwybodaeth eraill. Mae'n broses syml ac nid yw'n cymryd mwy na 10 munud.

# Pam bod angen i mi gofnodi fy olion bysedd?


Bydd y cerdyn adnabod yn cyfuno eich manylion personol sylfaenol gyda'ch nodweddion personol unigryw – cofnodion electronig o'ch wyneb a'ch olion bysedd – gan fod y rhain yn anodd iawn i'w ffugio, eu dwyn, eu hanghofio neu eu colli.

Mae'r DU hefyd yn ymrwymedig i ddilyn safonau newydd yr UE a gynlluniwyd i sicrhau mai pasbortau'r UE yw'r rhai mwyaf diogel yn y byd a bydd angen rhoi olion bysedd ar sglodion electronig pob pasbort o 2012. Felly hyd yn oed os nad ydych am gael cerdyn adnabod neu os nad oes angen un arnoch, bydd angen i chi gofnodi eich olion bysedd o hyd fel rhan o'ch cais am basbort.



# Sut un fydd y cerdyn adnabod?

Bydd llawer o'r nodweddion cynllunio ar eich cerdyn adnabod yn cydymffurfio â safonau rhyngwladol fel y gellir ei ddefnyddio fel dogfen i deithio yn Ewrop, a bydd yn edrych yn debyg i'r enghraifft isod. Rhif dyroddi'r cerdyn fydd y rhif ar y cerdyn, ac nid eich rhif Cofrestru Hunaniaeth Cenedlaethol.



Bydd y sglodyn (a fydd i'w weld ar y cefn) yn cynnwys yr un wybodaeth bersonol â'r hyn ar flaen y cerdyn, gan gynnwys lluniau o'ch olion bysedd, ond heb gynnwys eich llofnod. Byddwch hefyd yn cael rhif PIN, sy'n debyg i'r rhif a ddefnyddir ar gyfer peiriant codi arian. Mae'r PIN (y gallwch ei newid i rywbeth mwy cofiadwy) yn ffordd syml i chi sicrhau na all neb arall ddefnyddio eich cerdyn.



# Sut y caiff fy ngwybodaeth bersonol ei storio?

Caiff eich gwybodaeth bersonol ei storio ar y Gofrestr Hunaniaeth Genedlaethol mewn ffordd sy'n golygu ei bod yn ddiogel. Byddwch yn gallu ei defnyddio bryd bynnag y byddwch am brofi pwy ydych.

Mae'r wybodaeth fywgraffyddol y byddwn yn ei storio yma yn debyg i'r wybodaeth a gaiff ei storio ar y gronfa ddata basbortau yn ogystal â'ch Rhif Yswiriant Gwladol. Chi fydd yn rheoli eich gwybodaeth – byddwch yn gallu gweld eich gwybodaeth bersonol graidd unrhyw bryd drwy ddefnyddio gwasanaeth gwirio ar y rhyngwrdd. Os byddwch yn darganfod unrhyw anghysondeb ar eich cofnod gallwch gysylltu â ni i gael help.

Ar y gwasanaeth gwirio gallwch hefyd weld cofnod o unrhyw weithgaredd yn erbyn eich cofnod o'ch gwybodaeth bersonol ('y log archwilio'). Pan fyddwch yn caniatáu i rywun wirio yn erbyn eich cofnod caiff ei gofnodi'n awtomatig ar yr adeg y caiff y gwiriad ei wneud. Ni chofnodir unrhyw fanylion o'r rheswm dros y gwiriad, dim ond y ffaith bod gwiriad wedi ei wneud a chan bwy. Os byddech yn gweld gweithgaredd nad oeddech yn ei adnabod gallech godi hynny gyda'r Gwasanaeth Hunaniaeth a Phasbortau a byddem yn ymchwilio iddo.

Os bydd angen i chi newid eich cofnod, er enghraifft am eich bod wedi symud, byddwch yn gallu cysylltu â'r Gwasanaeth Hunaniaeth a Phasbortau ac, unwaith y byddwn wedi cadarnhau mai chi yw perchennog cywir y cofnod hunaniaeth hwnnw, bydd gwneud y newid yn broses syml. Ac, os byddwch am i ni wneud hynny, byddwn yn defnyddio'r wybodaeth newydd i ddiweddarw cofnodion eraill yn y sector cyhoeddus i arbed amser i chi a helpu i sicrhau eich bod yn cael y gwasanaethau cywir yn y ffordd fwyaf effeithlon.

Ni chaiff eich gwybodaeth ei throsglwyddo i sefydliad yn y sector preifat heb eich caniatâd.

# Beth fydd yn digwydd os byddaf yn colli fy ngherdyn?

Os byddwch yn colli eich cerdyn adnabod (neu basbort) byddwch yn gallu rhoi gwybod i ni fel y gallwn ei ganslo ar ein system. Yna ni all neb arall ei ddefnyddio mewn unrhyw sefyllfa pan fydd sefydliad yn dilysu'r manylion gyda ni. Ni fydd neb arall yn gallu ei ddefnyddio eisoes yn unman lle mae angen PIN neu olion bysedd os byddwch wedi cadw eich PIN yn gyfrinach.

Wedyn byddwch yn gallu dewis p'un a ydych am wneud cais am gerdyn newydd ai peidio.

Os byddwch am gael cerdyn newydd bydd angen i chi wneud cais i'r Gwasanaeth Hunaniaeth a Phasbortau naill ai'n uniongyrchol neu drwy un o'r cyfleusterau a ddarperir gan ein partneriaid ar y stryd fawr, fel pan wnaethoch gais am y tro cyntaf. Mae'n bosibl y byddwch am gael cerdyn newydd yn gyflym, felly bydd hon fel arfer yn broses llawer cyflymach na'r tro cyntaf y cawsoch eich cerdyn. Mae hyn oherwydd y gallwn ddilysu pwy ydych yn erbyn eich cofnod presennol.

# Pwy sy'n gofalu am fy muddiannau?

Bydd swydd newydd Comisiynydd y Cynllun Hunaniaeth Cenedlaethol yn annibynnol ar y Gwasanaeth Hunaniaeth a Phasbortau ac o leiaf unwaith y flwyddyn bydd yn cyflwyno adroddiad i'r Ysgrifennydd Cartref, sy'n gorfod rhannu'r adroddiad gyda'r Senedd ac ateb cwestiynau ASau.

Bydd rôl y Comisiynydd yn cynnwys archwilio sut mae'r Gwasanaeth Hunaniaeth a Phasbortau yn sicrhau bod gwybodaeth yn gywir, yn ddiogel ac wedi'i ddiweddarau, gan adolygu'r defnydd a wneir o'r cardiau, a goruchwyllo'r weithdrefn gwyno.

Bydd yn ofynnol i unrhyw adran o'r llywodraeth sy'n defnyddio'r Gwasanaeth Hunaniaeth Cenedlaethol ddarparu gwybodaeth i Gomisiynydd y Cynllun sut mae'n cadw gwybodaeth sy'n ymwneud â hunaniaeth yn ddiogel a sut mae'n defnyddio cardiau adnabod. Bydd unrhyw fusnes sy'n defnyddio'r Cynllun hefyd yn cael ei orfodi i gydymffurfio â cheisiadau am wybodaeth gan Gomisiynydd y Cynllun.

Yn anad dim, bydd Comisiynydd y Cynllun yno i ofalu am eich buddiannau.

Rydym hefyd wedi derbyn ac yn cefnogi'r cynnig ar gyfer Siarter Hunaniaeth, a fydd yn nodi hawliau a chyfrifoldebau'r Llywodraeth ac unigolion mewn perthynas â'r Gwasanaeth. Caiff y siarter ei lywio gan waith Panel y Cyhoedd newydd, sy'n cynnwys aelodau o'r cyhoedd (gyda chymorth arbenigwyr) a fydd yn gallu rhoi sicrwydd pellach bod y Gwasanaeth yn gweithio er budd y cyhoedd, ac i fusnesau a'r Llywodraeth.

# Eich helpu i ddefnyddio'r Gwasanaeth

Bydd cyngor a chymorth ar gael gan y Gwasanaeth Hunaniaeth a Phasbortau. Rydym yn ymrwymedig i weithio gydag amrywiaeth o sefydliadau i sicrhau bod gwybodaeth a chymorth ar gael i ddiwallu anghenion penodol a'i fod wedi'i deilwra ar gyfer amgylchiadau gwahanol pobl ledled y DU.

## **Cael gwybod mwy**

I gael gwybod mwy am y Gwasanaeth Hunaniaeth Cenedlaethol neu gardiau adnabod ewch i'n gwefan yn [www.ips.gov.uk/identity](http://www.ips.gov.uk/identity)

I gael gwybod mwy am gardiau i wladolion tramor, ewch i [www.ukba.homeoffice.gov.uk/managingborders/idcardsforforeignnationals/](http://www.ukba.homeoffice.gov.uk/managingborders/idcardsforforeignnationals/)

I gael cyngor ar ddiogelu eich hun rhag twyll hunaniaeth ewch i [www.identity-theft.org.uk/](http://www.identity-theft.org.uk/)



**75%** wedi'i ailgylchu  
Mae'r cyhoeddiad hwn wedi'i argraffu  
ar bapur sydd wedi'i ailgylchu 75%